

تحقیقات مرده زایی: مالومات بلده والدین

مرده پیدا شیدون نیلغه شوم یک وقت مشقت بار بلده فامیلی استه و از بابت ضایعه شوم متاسف استی. بلده از مو مهم استه که د ای مدت از شمو مراقبت کیده و کمک کینی.

والدینی که تجربه مرده زایی ره دیرن بلده از مو گفتن که چی رقم مالوماتی ره اونا د باره تستایی قابل دسترسی و کالبد شکافی میخاین بوفامن. مو مالومات ره د ای ورق مالوماتی نوشته کیدی که شمو ره د دوران گفتگو د باره کالبد شکافی و دیگه رقم تحقیقات که بلده شوم پیشنهاد شونه کمک کینه. ای میتینه بهترین چانس ره بلده شوم ببیده تا بوفامید که دلیل ازی اتفاق که افتیده چیز استه. کار مندایی که از شوم مراقبت مونه هم بلده شوم فرصت میدیه که هر رقم سوال پرسان کینید و کمک کینه که راه های موجود ره بوفامید.

مو مو فامی که ای گفتگوها و تصمیمها مشکل استه. هر رقم جواب که ببیدید درست استه و هر رقم تصمیم که بیگرید، شمو ره کمک مونی. مو ای ره هم مو فامی که مالوماتی که د نیلو نوشته شیده خیلی مشکل استه و د وقت خواندون شی د کمک اضافی ضرورت دیرید. لطفاً د باره پرسان کیدون هر رقم سوال و تشویشای خو دودله نشید.

تحقیقات مرده زایی

چی رقم تستا ره کارمندا بلده از مو پیشنهاد خاد کنن؟

نظر د رقم حامله گی و رقم مالوم شیدون نیلغه و یار نیلغه، بعد از ولادت بلده مادر تستای خون مختلف پیشنهاد خاد شد. ای شاید شامل هر رقم مشکل قد میزان قند خون، لخته شیدون خون، کارکرد جگر، عفونت ها و توغ کنی که اگه یگو قاتی شیدون خون بین مادر و نیلغه باشه. بلده شوم انواع مختلف تست از خاطر نیلغه شوم، از معاینات عمومی که قد چیم توغ موشه گرفته تا کالبد شکافی، همراهی تستای عمومی تاکه مالومات اضافی مهم د دست بایه پیشنهاد خاد شد. یار نیلغه (placenta) هم د عنوان بخشی از معاینه ها تست شیده و میتینه مالومات با ارزش ره فراهم کینه.

چره تستا و کالبد شکافی بعد از ای که نیلغه مو مرده پیدا شده بلده از مو پیشنهاد موشه؟

تمام معاینات انجام دیده موشه تاکه فامیده شونه که نیلغه شوم از چیز خاطر از بین رفته. اکثر والدین موگین که دلیل اصلی که کالبد شکافی ره انتخاب کیدن امی بوده که کمک شونه هر رقم مشکلی ره که بلده حامله گی های آینده و اولادا تاثیر دیشته شه بوفامن. انجام دیدون کالبد شکافی همچنان میتینه قد غم و اندوه و تشویشای شوم د حامله گی های آینده شوم کمک کینه. اگه یک دلیل پیدا شونه، مراقبت بلده حامله گی های آینده شوم تغییر دیده خاد شد تاکه از ضایع شیدون نیلغه دیگه جلوگیری شینه. حتی اگه یگو دلیل پیدا نشینه، ای میتینه اطمینان بخش باشه از خاطریکه ای میتینه بعضی از احتمالات ره مالوم کینه.

کالبد شکافی

کالبد شکافی یک حصه تحقیقات پیشنهاد شده د باره ضایع شیدون نیلغه شوم استه. ای کار همیشه شامل معاینات دقیق بدن استه تاکه یگو علائم غیر معمولی ره شناسایی کینه.

آیا کالبد شکافی رقم رقم استه؟

اری، کالبد شکافی 3 رقم استه؛ کامل، محدود یا معاینه خارجی

- کالبد شکافی کامل، که رقم یک عملیات جراحی وری استه. تمام اعضای بدن معاینه موشه، و انواع تستا انجام موشه.
- کالبد شکافی محدود، که فقط بعضی قسمتای بدن معاینه موشه.
- معاینات خارجی توسط یک آسیب شناس (pathologist) د اضافه یا بغیر عکس برداری، مثل ایکسری یا MRI.

یک کالبد شکافی کامل چیز استه و د وقتایی که کالبد شکافی مونه چیز کار مونن؟

یک کالبد شکافی کامل از طریق معاینات بدن و اعضای داخلی استه که توسط یک آسیب شناس انجام موشه. آسیب شناس یک داکتر متخصص استه که د تحقیقات نیلغه مرده پیدا شده بسیار آموزش دیره که قد نیلغه شوم د دوران تحقیقات قد عزت و احترام برخوردار مونه.

مثل یک عملیات، یک پارگی د قسمت درازی سینه و شکم و پشت گوش بلده توغ کدون اعضای داخلی انجام موشه. نمونای ریزه نسج از اعضای بدن گرفته موشه. اونا د زیر میکروسکوپ توسط آسیب شناس معاینه موشه. نمونای نسج



بلده تستای جنیٲیکی برده موشه که کروموزوم و ژن های نیلغه ره تست کنه. اگه بدون عفونت مشکوک باشه، نمونه مایعات اعضای بدن بلده تست بکتریا ریی موشه. د دوران معاینات عکسای کلینیکی هم گرفته موشه.

بعد از معاینات، به جز از نمونای نسج دیگه تمام اعضا پس د داخل بدن ایشته موشه. بعضی وقتا، یک عضو بدن لازمه که بلده معاینات نزدیک و تستای اضافی کشیده شونه که شاید وقت زیادتر بیگره.

یک کالبد شکافی کامل شمو ره بهترین چانس مهیا مونه که بوفامید دلیل از بین رفتن نیلغه شوم چیزه بوده.

د یک کالبد شکافی محدود، آیا گفته می تینی که چی چیز ره توغ مونه و یا نمونه؟

اری، د یک کالبد شکافی محدود، گفته می تنید که چی چیز ره معاینه کینه یا نه کینه. می تنید خیلی دقیق باشید. د فورمه که بلده رضایت کالبد شکافی امضا مونید، یک جای استه که هر رقم محدودیت ره نوشته کنید یا چیک کید که اونا نوشته شیده باشه. آسیب شناس همیشه ازی هدایات پیروی مونه.

چی چیز شامل یک معاینه بیرونی موشه؟

محدودترین شکل کالبد شکافی معاینات خارجی استه که پارگی وجود ندیره و اعضای داخلی بدن معاینه نه موشه. آسیب شناس بدن ره د صورت دقیق مطالعه مونه. عکسای کلینیکی و اندازه کلان شیدو گرفته موشه. بعضی وقتا یک ایکسری یا یک MRI هم انجام دیده موشه. راه های گرفتون یک نمونه از پوست بلده تست جنیٲیکی هم استه. اگه ای تست ره می خوابید، در فورمه رضایت نوشته شده استه.

نیلغه از مو بعد از کالبد شکافی چی رقم مالوم موشه؟

بعد از معاینات خارجی نیلغه شوم بعضی کوک خوردگی ره خاد دشت، رقم بعد از یک عملیات وری. نظر د رقم کالبد شکافی که انتخاب کیدید، کوک خوردگی شاید د پشت گوش و د قسمت سینه و شکم شی باشه. یکدغه که کالا د جان نیلغه شوم دد، کوکای شی مالوم نه موشه.

آیا کالبد شکافی همیشه دلیل ازی ره که چره نیلغه مو مرده د دنیا امده پیدا مونه؟

دلیل اصلی کالبد شکافی ای استه که دلیل اصلی وفات نیلغه ره پیدا کیده و د باره نیلغهایی که مرده پیدا موشه، تخمین بیزنه که نیلغه چند دیر پیش از بین رفته بوده. حتی اگه داکتر شوم از دلیل مرگ مطمئن باشه، تایید کیدو قد کالبد شکافی میتینه خیلی اطمینان بخش باشه. د اکثر قضیه ها، کالبد شکافی دلیلی تازه ره پیدا کیده که دلیل احتمالی مرگ ره تغییر دیده یا اصلاح کیده یا مالومات اضافی دیده. کالبد شکافی شاید دلیل هم پیدا نه تینه، ولی ای کار باز کمکننده استه بخاطر یکه بعضی دلایلا ره مالوم مونه.

آیا کالبد شکافی ای مالومات ره میدیه که ممکن استه ای اتفاق دوباره رخ بیدیه و آیا یگو کاری استه که انجام بدیم تا از رخ دیدون شی جلوگیری کنه؟

کالبد شکافی میتینه یک مریضی ره شناسایی کینه که ممکنه در حاملگی های آینده هم اتفاق بوقته. بعضی از مثالی شی شامل غیر معمولی بودن جنیٲیکی، یک مشکل قد یار نیلغه یا یک ناجوری د مادر باشه. فامیدون ازی ناجوری ها شاید مو ره کمک کینه که از مرده پیدا شیدون نیلغه د آینده جلوگیری کینی.

پیش از معاینه و باد از معاینه قد نیلغه شوم چیز اتفاق موقته؟

کی کالبد شکافی ره انجام میدیه و د کجا انجام خاد دد؟

کالبد شکافی توسط یک آسیب شناس از خدمات کالبد شکافی دوران تولد آسترالیای جنوبی د غسل خانه شفاخانه زنانه و اطفال (WCH) د شمال ادلاید انجام دیده موشه.

نیلغه از مه ره چی رقم د اونجی موبره؟

اگه نیلغه شوم د WCH باشه، یک قابله نیلغه شوم ره د غسل خانه شی موبره. اگه نیلغه شوم د یگو جای دیگه تولد شده باشه، شفاخانه سریشته مونه که نیلغه ره بیره. شمو هم میتینید که مدیر تشیع جنازه از طرف خود خو انتخاب کینید که نیلغه شوم ره د WCH بوبره.

د وقتایی که نیلغه مه د غسل خانه استه یا د از مراحل کالبد شکافی تیر موشه از شی چی رقم مراقبت موشه؟

کارمندای غسل خانه و تیم آسیب شناسی قد نیلغه شوم د تمام وقت قد ملایمت، احترام، احتیاط و مهربانی رفتار مونن.

نیلغه مه بلده چند دیر د غسل خانه شفاخانه بلده کالبد شکافی مومنه؟

معمولاً نیلغه شوم د غسل خانه بلده 2 تا 3 روز مومنه. نظر د بعضی تسنا که انجام موشه، بعضی وقتا معاینات زیادتر وقت میگره.

آیا مه میتینوم پیش از کالبد شکافی قد نیلغه خو یکجای وقت تیر کنوم؟

د وقتایی که د شفاخانه استید نیلغه شوم میتینه د پیش خود شوم باشه. د نزدیک غسل خانه هم یک اطاق استه که د اونجی میتینید پیش از کالبد شکافی قد نیلغه خو باشید / د بغل خو بیگرید.

آیا مه میتینوم بعد از کالبد شکافی قد نیلغه خو یکجای وقت تیر کنوم؟

اگه تا تکمیل شیدون کالبد شکافی نیلغه خو هنوزم د شفاخانه بودید، نظر د موقعیت شفاخانه، برنامه ریزی ترانسپورت و آمادگی بلده دفن کیدو، شاید بعد از معاینات بیتینید نیلغه خو ره د پیش خو د اطاق دیشته شید. اگه د خانه بودید، میتینید باید و د اطاقی که د پالوی غسل خانه استه نیلغه خو ره بغل کید یا قد شی وقت یکجای تیر کید. همچنان میتینید قد نیلغه خو د مرکز تشیع جنازه، یا د خانه وقت یکجای تیر کینید.

آیا پیش یا بعد از کالبد شکافی میتینوم نیلغه خو ره بلده کم وقت د خانه بو بروم؟

تاجایی که ممکن باشه مو کمک مونی که آرزوهای شوم برآورده شونه. اگه می خوایید که نیلغه خو ره د خانه بویرید، لطفاً قد کارمندای مو که از شوم مراقبت مونه توره بوگید.

آیا کالبد شکافی یا یگو تستای دیگه بلده از مه کودم مصرف هم دیره؟

اگه کار د مدیکر دیشته شید، کالبد شکافی و تستایی که د دوران معاینات انجام موشه کودم مصرف ندیره. اگه مطمئن نیستید، از کارمندا پرسان کید.

مسائل فرهنگی

اگه از نظر فرهنگی و دینی مو کودم طریقه یا کارایی باشه که قد بدن بعد از مردو د نظر بیگریم چه کار کنوم؟

ای مهم استه که کارمندا بوفامه که چی چیز بلده شوم مهم استه تا که شوم ره د طریقای فرهنگی و دینی شوم کمک کنن. اگه ضرورت باشه، کارمندا میتینن قد کلان دینی و اجتماع شوم هم توره بوگیه.

وقت کالبد شکافی ره معمولاً یک رقم جور مونه که قد ضرورتای دینی و فرهنگی شوم سم بایه. لطفاً قد قابله، داکتر یا کارمند اجتماعی یا کارمند مراقبتی معنوی خو توره بوگید و اونا میتینن ای ره قد آسیب شناس هماهنگی کینن.

فامیلی های بومی شاید بخواین که نیلغه و یار نیلغه پس د منطقه شی ری شونه. مو د ای باره قد شوم کمک مونیم.

جور کیدون خاطرات

آیا مو هنوزم وقت دیری که قد نیلغه خو خاطره جور کینی؟ آیا کارمندای غسل خانه یگو یادگاری جور مونن؟

اری، مو شوم ره تشویق مونی تا که نیلغه شوم د شفاخانه استه قد شی خاطرات جور کید. شاید بخوایید عکس بیگرید یا نشان دست/پای شی بیگرید، بلده شی قصه بخوانید، نیلغه خو ره د فامیلی یا دوستا معرفی کنید و غیره. ای انتخاب شخصی استه که شوم د حیث پدر مادر بیگرید یا قد دیگه کساییکه د زندگی شوم مهم استه سلا کید. اگه خواسته باشید کارمندا د ای باره شوم ره کمک میتینن.

اگه انتخاب کینید که یک کالبد شکافی ره توسط خدمات کالبد شکافی پیش از وقت تولد آسترالیای جنوبی (SA Perinatal Autopsy Service) انجام بید، اونا میتینن که یک بسته یادگاری هم جور کینن. ای میتینه شامل عکسای دیجیتال د کیفیت بسیار خوب باشه که نیلغه شوم لباس د جان شی دیده شده و پید شده باشه، نشان دست و پای شی، بند نام شی و بسته موی شی (اگه امکان دیشته شه) شینه. عکسای که د دوران کالبد شکافی گرفته موشه یک خاطرات خاص استه، ولی قد گذشت زمان نیلغه شوم دیگه رقم مالوم موشه.

اگه خواسته باشید که یک بسته یادگاری دیشته شید، باید یک فورمه رضایت ره امضا کینید یا تلفنی رضایت بیدید. هیچ کار بدون رضایت شوم قد نیلغه شوم نموشه. بلده بسته یادگاری از شوم پیسه نه میگره.

اگه نیلغه شوم د یک شفاخانه بغیر از WCH تولد شیده باشه، بسته تکمیل شده د بخش زایمان امزو شفاخانه ری خاد شد. یک قابله قد شوم تماس میگره که بید بویرید، یا بسته یادگاری ره بلده شوم ری مونن. اگه نیلغه شوم د WCH تولد شد، یگو کس از بخش خدمات اجتماعی قد شوم تماس میگره که بوردون ازو ره هماهنگ کینه یا بلده شوم ری کینه. اگه یگو

سوال دیرید، میتینید از طریق سویچ بورد قد خدمات اجتماعی زنان د شماره 81617000 با استفاده از نام مادر تماس بیگرید.

یار نیلغه (placenta)

چره یار نیلغه د حیث یک بخشی از معاینات ضروری استه؟

یک مشکل قد یار نیلغه شاید باعث شده باشه که نیلغه از بین بوره، امزی خاطر مهم استه که یار نیلغه هم معاینه شونه. د اکثر قضیا، تست کیدو و معاینه یار نیلغه دلیل از بین رفتونی نیلغه ره مالوم مونه. راپور آسیب شناسی یار نیلغه بلده داکتری که درخواست دیده بود و داکتر فامیلی ری موشه (اگه درخواست کیده بود). ای شامل یک بخش از راپور آخری کالبد شکافی هم استه.

آیا بعد از معاینات میتینوم که یار نیلغه ره پس بیگروم؟

اری، میتینید درخواست کنیید که بعد از معاینات یار نیلغه ره پس بدیه. میتینید یار نیلغه ره دفن کینید ولی از خاطریکه مواد کیمیاوی د یار نیلغه اضافه شیده، نمیتینید که بوخرید یا د شکل کپسول بوخرید. اگه می خوایید که یار نیلغه ره بلده شوم پس بدیه، لطفاً د فورمه رضایت درخواست کید.

رضایت

آیا تست و کالبد شکافی بغیر رضایت از مه انجام خاد شد؟

هیچ تحقیقاتی بغیر رضایت شوم انجام دیده نموشه. د اکثر موارد، شوم کنترول کامل دیرید که چیز کار شونه اما، د بعضی شرایط، طبیب قانونی شاید دخالت کینه و شاید بلده مسائل حقوقی درخواست یک کالبد شکافی کامل ره کینه. ای کار اکثرأ صورت نه میگره، و شوم ره خبر خاد کن.

آیا کسایی که بلده از مه مهم استه د مراحل تصمیم گیری شامل بوده میتین؟

مادری که نیلغه مرده د دنیا اوورده تانا کسی استه که از نظر قانونی میتینه بلده کالبد شکافی رضایت بدیه. اما، اگه خود شوم قبول کینید کسایی دیگه که بلده شوم مهم استه میتینه قد شوم گفتگو کینه تاکه کمک شونه که تصمیم بیگرید که آیا رضایت بدید یا نه، میتینید از کارمندا درخواست کینید که اونا ره د ای گفتگو شامل کینن. اگه مادر مریض باشه، و نتیجه که رضایت بدیه، پدر یا نفر کلان خانواده میتینه رضایت بدیه.

چی وقت باید تصمیم بیگروم؟

داکترا، قابله ها و کارمندا اجتماعی که د مراقبت شوم شریک استن میتینن د تصمیم گیری قد شوم کمک کینن. میتینید تا یک هفته وقت بیگرید که تصمیم بیگرید (یا پیش از دفن یا سوزاندو)، ولی اگه کالبد شکافی د بین 4 تا 5 روز ره انجام شونه، کیفیت نتیجه شی خوبتر میه.

راپور کالبد شکافی

چی رقم مالوماتا د بین راپور کالبد شکافی خاد بود؟

ای راپور یک سند طبیی استه. ای راپور مالومات کلینیکی حاملگی ره د تفصیل شرح دیده و قد نتیجه گیری معاینات بعد از مرگ ارتباط میدیه. اگه دلیل پیدا شونه، دلیل مرگ ره بیان مونه. ای ره بلده داکتر که فورمه رضایت کالبد شکافی ره قد شوم امضا کیده ری مونه.

آیا مو میتینی راپور طبیی کالبد شکافی ره بوفامی؟

د راپور از زیبون طبیی استفاده موشه. میتینید یک کاپی راپور کامل ره بیگرید یا ای خوبتر خاد بود که یک راپور د زیبون ساده بیگرید. مو میتینی ای ره بلده شوم آماده کینی.

چی قدر دیر وقت میگره که نتیجه یک کالبد شکافی یا دیگه تحقیقات ره بیگری؟

مدت زمانی که نتیجا آماده شونه فرق مونه، ولی احتمالاً بین 8 و 10 هفته استه. بلده شوم د 8 تا 10 هفته بعد از تولد د شفاخانه وقت دیده موشه تاکه نتیجا ره بلده شوم توضیح بدیه.

آیا یک کاپی از راپور کالبد شکافی بلده داکتر فامیلی یا سازمان مراقبت کننده صحی از مو ری موشه؟

شوم میتینید درخواست کینید که یک کاپی از راپور کالبد شکافی بلده داکتر فامیلی یا سازمان مراقبت کننده صحی د انتخاب خود شوم ری شونه.

آیا یک کالبد شکافی قد تحقیق کمک موشه؟

اگر دبله فورمه رضایت اجازه دیده شده باشه، نمونه‌ای نسج که د کالبد شکافی گرفته شده و مالومات د راپور کالبد شکافی شاید بلده تحقیق استفاده شونه. ای تحقیق د آینده شاید یک زمانی بلده کمتر کیدون تعداد نیلغهایی که مرده پیدا موشه کمک کینه.

حتی اگر یک نفر از مو انگلیسی توره گفته بیتنی، میتنی درخواست یک ترجمان کینی؟

اری، ای مهم استه که هر دوی شوم کاملاً بوفامید که چره تست ره بلده شوم پیشنهاد کیده، چی مالوماتی از تست بدست مه یه و چی چیز شامل استه. لطفاً قد کارمندا بوگید تا که اونا یک ترجمان بیگرن که د ای گفتگوی مهم کمک کینه.

اگر سوالاتی زیادتر دیشته شوم، چیز کار کنوم؟ از کی پرسان کنوم؟

میتینید از هر کارمندی که از شوم و نیلغه شوم مراقبت مونه پرسان کنید.

بلده مالومات زیادتر

**SA Maternal, Neonatal & Gynaecology
Community of Practice**
L3, 77 King William Road

North Adelaide SA 5006
Telephone: 08 8161 9459

www.sahealth.sa.gov.au/stillbirth



www.ausgoal.gov.au/creative-commons



*SA Health Safety and Quality Community Advisory Group



Government
of South Australia

SA Health